

客語口說藝術稿—蕃薯蕃薯

A、B (唱): 一二三，著新衫
四五六，走相逐
七八九，學打球
先生教涯讀新書
涯教先生煨蕃薯啊，煨蕃薯！

阿元仔、阿雯仔來食蕃薯喔！

C、D：恁好喔，有蕃薯好食喔。

蕃薯蕃薯，園到泥肚
裡背恁烏，又有老鼠
分人挖來剝，分人挖來煮
毋識聽佢喊過苦啊，喊過苦！

C：涯盡好食蕃薯了，又香又軟又營養。

D：涯也係，恩哩西湖个蕃薯盡有名，做冰薯、綠豆椪、也係蕃薯粥，全部都當錫人食喔！

A：係啊，恩西湖就盡適合種蕃薯，涯有時也會跔阿公去田項改蕃薯，分蕃薯遞藤，故所，涯就曬到烏刻刻仔，像火炭樣仔。

B：無毋著，「蕃薯就愛人爪癢，越爪越癢越肯長。」，年下仔，就會有當多蕃薯好食哩唷！

D：種蕃薯當辛苦，故所，頭擺人講：有妹莫嫁大山背，上崎堵嘴，下崎堵背，食蕃薯，傍豬菜。

C：這下，大家知食蕃薯當養生，顛倒搶等愛哩唷！

A：阿薰仔，你仰面臭臭仔呢？

D：唉，這擺考試考毋好，轉去食了當多竹修板啊！

BC：涯看你還愛食蕃薯籤喔。

嘴扁扁，想食大牛眼，

嘴嘟嘟，想食鹹豆腐，

嘴圓圓，想食板仔圓。

嘴尖尖，想食蕃薯籤啊，蕃薯籤！

A：喔伊，你兩儕狐狸莫笑貓，平平尾翹翹。莫笑阿薰仔哪！神仙打鼓有時錯，
腳步踏差麼人無呢？

D：阿棋仔，恁仔細！仰還生趣吼，今晡日，恩俚打嘴鼓竟然三句不離蕃薯。

A：係啊，吾公識講過：蕃薯摻恩客家人个關係當密切喔！頭擺人，生活苦，鑊
頭肚个蕃薯總係比飯多。

B：難怪，愛安慰人毋使忒愁慮，就會講：「時到時當，無米正來煮蕃薯湯。」
實在有意思喔！

C：先生乜有講，騎喔多敗一定愛戴安全帽，無个話，會「無命食蕃薯湯」喔！

D：該恩來做大蕃薯好無？

ABC：無愛唷。愛做你去做～

D：哈！

合：大蕃薯，真糊塗，

好食懶做毋讀書

會算毋會除，

糶米換番薯。

明明蛇哥講係龍，

明明貓公講係虎，

明明韭菜講係蔥，

明明菜瓜講係菩啊，講係菩！

合：歡迎大家來西湖寮，煨蕃薯，食蕃薯，毋係來做大蕃薯喔！

阿棋仔、阿雯仔、阿薰仔、阿元仔，下臺一鞠躬，恁仔細，正來寮！